



Komunikadu Imprensa
27 Juñu 2024

Komisáriu Eleitu tenke hatudu ninia independénsia no imparcialidade durante hala'o knaar tuir lei haruka

Komisáriu CAC ne'ebé eleitu iha Parlamentu Nasionál (PN) iha Segunda-feira, 24 Juñu 2024 ho votu 41 hosi deputadu na'in 45 ne'ebé marka prezensa, tenke hatudu ninia independénsia no imparcialidade durante hala'o knaar tuir lei haruka.

Prosesu nomeasaun ne'e extremamente importante duni atu priense lakuna vagatura durante tinan ida resin, ne'ebé rezulta CAC totalmente la funsiona hodi ezerzese ninia knaar nu'udar orgaun polisial atu prevene no kombat korrupsaun. Mézmuke nune'e, JSMP kontinua ezije atu durante ezerse knaar nu'udar Komisáriu CAC, tenke kaer metin no defende prinsípiu "independénsia no imparcialidade institusionál" atu hases tiha dúvida públiku kona-ba kestaun sira ne'ebé públiku preokupa no kestiona.

Artigu 8 (2) Lei Nú. 8/2009 ne'ebé altera ho Lei Nú. 1/2024 kona-ba CAC nian garante katak Kandidatu ba Komisáriu tenke rekoñesidu ninia independénsia no imparcialidade ne'ebé ho nivel aas. Enkuantu durante ne'e, iha preokupasaun no espekulasaun oioin iha nivel sosiedade kona-ba qualidade Komisáriu elitu ninia independénsia no imparcialidade.

Antes ne'e, iha 20 Juñu 2024, JSMP apresenta ona preokupasaun sériu relasiona ho kestaun independénsia no imparcialidade "Komisáriu dezignadu" ne'ebé eleitu dadaun ne'e, tanba iha informasaun hosi fontes kredivel sira informa katak Komisáriu eleitu asume knaar xave iha partidu ne'ebé kaer ukun. Tanba ne'e, JSMP husu deputadu sira iha PN hodi uja sira nia kompeténsia nu'udar órgaun lejislador no fiskalizador atu ezamina legalidade hosi prosesu nomesauun ne'e tuir lei haruka.

"Ezijénsia kona-ba kestaun independénsia no imparcialidade ne'e fatór determinante no nu'udar pre-kondisaun ba kargu Komisáriu nian antes ita diskute kestaun seluk. Ida ne'e atu evita konfliktu interese no bele asegura katak durante Komisáriu ida ezerse ninia knaar la hetan interferénsia direita ka indireta no livre hosi kualkér forma influénsia hosi poder polítiku sira", dehan Sra. Ana Paula Marçal, Diretora Ezekutiva JSMP.

Papél no knaar Komisáriu nian sentráal tebes atu lidera investigasaun ba kazu sira envolve entidade públiku ka ofisiál nivel alta sira iha instituisaun estadu , ne'ebé inklui atu supervizona no orienta ekipa investigador sira servisu ho qualidade aas no hetan konfiansa hosi públiku. Ne'e duni, preokupasaun sira relasiona ho kondisaun sira lei ezije ne'e tenke hetan atensaun sériu hosi sosiedade no entidade xave sira hotu.

Tanba ne'e mós iha pozisaun anteriór sira, JSMP ezije atu prosesu sira ba rekrutamentu no nomeasaun tenke organiza iha forma ida-ne'ebé nakloke (aberta), kompetitivu liuhosi konkursu públiku ne'ebé permite espasu ba timoroan sira hotu ne'ebé iha kapasidade, integridade, kredibilidade no méritu atu kompete ba pozisaun ne'e.

Prosesu hirak ne'e atu asegura mós katak Komisáriu eleitu la ta'uk lakon ninia pozisaun ka kargu bainhira ezerse nia mandatu atu investiga kazu korrupsaun sira ne'ebé envolve membru governu ka ezekutivu no setór privadu sira ne'ebé iha relasaun ho governu. Ida ne'e mós atu asegura katak Komisáriu sei halo servisu ne'ebé livre hosi forma influénsia la-nesesáriu sira, prevene konfliktu interese, hases impedimentu psikolójiku tanba iha "deve polítiku" ba partidu ne'ebé eleje ka nomea ba okupa pozisaun ne'e.

Iha era globalizadu no dijitalizadu hanesan ohin lora, iha possibilidade no oportunidade disponivel atu aprende barak hosi esperénsia nasaun seluk ne'ebé estabelese ajénsia sira identiku hanesan CAC Timor-Leste. Singapura no Hong Kong nu'udar modelu referénsia ne'ebé hatudu prova susesu boot iha sira ninia ezersísiu no esforsu sira luta kontra korrupsaun, tanba Komisaun ka ajénsia anti-korrupsaun sira goja direitu independénsia plena durante ezerse sira nia mandatu.

JSMP fiar katak governasaun atuál ne'ebé lideradu hosi Sua-Exelénsia PM Kay Rala Xanana Gusmão iha ninia diskursu ofisiál sira iha okaziaun oioin, apela no ezije ba membru governu sira atu servisu ho responsabilidade ba rekursu sira ne'ebé mai hosi Estadu ka orsamentu Estadu no tane aas prinsípiu transparénsia no boa-governsaun. Tanba ne'e asegura independénsia ba papél Komisaun Anti Korrupsaun, nu'udar elemente xave ida atu promove esforsu sira atu prevene no kombate korrupsaun no asegura katak programa governu nian benefisia no satisfaz ba interese públiku no povu kbiit-laek sira.

Tanba ne'e, JSMP konvida entidade hotu-hotu, sosiedade sivíl, estudante no kamada sosiál sira iha jerál, hodi pro-ativu halo akompañamentu ba prestasaun servisu no produtividade Komisáriu eleitu durante tinan dahuluk mandatu nian no se la hatudu indikasaun progresu pozitivu ruma – bele esplora mekanizmu sira ne'ebé lei garante atu apresenta petisaun ba orgaun soberanu sira tuir Lei Nú. 2/2024 kona-ba Direitu Ezersísiu Petisaun nian.

Atu hetan informasaun kompleitu, favór kontaktu:

Ana Paula Marçal
Diretora Ezekutiva JSMP
Diresaun e-mail: ana@jsmp.tl
Website: <http://jsmp.tl>
www.jsmp.tl